

**Komunikadu Impresa
Parlamentu Nasional
4 Fevereiru 2015**

Parlamentu Nasional halo apresisaun relatóriu ba Komisaun Inkéritu Parlamentár ho rezolusaun

Iha Segunda-Feira 2 Fevereiru 2015, liuhosi reunião Plenária, Parlamentu Nasional (PN) halo apresisaun ba relatóriu Komisaun Inkéritu Parlamentár ho rezolusaun. Objetivu kriasaun komisaun ne'e atu buka hatene iregularidade ba projetu emergéncia sira ne'ebé ezekuta hosi Ministériu Obras Pública iha 2013.

Iha relatóriu ne'e, komisaun identifika katak projetu emergéncia barak la tuir prosedimentu formál no legal. Iha 2013, Governu la prevee orsamentu ba projetu emergéncia. Projeto sira ne'e balun hala'o no finaliza ona, balun la finaliza. Hosi balun ne'ebé finaliza, barak mak la iha kualidade no nia orsamentu bo'ot liu fali projeto foun sira.

“JSMP apresia tebes iniciativa PN hodi kria komisaun inkéritu ne'e hodi halo investigasaun ba projetu sira ne'ebé la tuir prosedimentu formál no legal. JSMP enkoraja instituisaun relevante no kompetente sira hanesan Tribunál Kontas hodi halo auditoria ba ministériu relevante no Komisaun Anti Korrupsaun (CAC) no Ministériu Públiku (MP) atu bele utiliza didi'ak informasaun no dadus sira ne'ebé komisaun ne'e fornese hodi investiga ho kle'an kazu sira ne'ebé iha indísiu krime no lori ba tribunál”, dehan Diretor Executivo JSMP, Luis de Oliveira Sampaio.

JSMP husu no enkoraja PN atu kontinua ho inisitiva di'ak ne'e hodi nafatin halo inkéritu ka fiskalizasaun ba projetu sira governu nian ne'ebé iha indísiu iregularidade, nune'e bele hadi'ak tan kna'ar fiskalizasaun PN nian no haforsa tan servisu CAC no MP nian iha prosesu kombaté korrupsaun.

Rezolusaun Nú. 21/2015 PN hodi apresia relatóriu Komisaun Inkéritu nian ne'e aprova ho votu afavór: 56, kontra: 0 no abstensaun: 2 hosi totál deputadu 58 ne'ebé marka prezensa.

Komisaun ne'e hala'o sira nia kna'ar durante fulan 3 no kompostu husi deputadu na'in 7 ne'ebé prezide husi presidente nain ida no visepresidente ida. Inkéritu ne'ebé hala'o sobre distritu 5 mak hanesan Manufahi, Covalima, Viqueque, Ainaro no Manatutu.

Atu hetan informasaun kle'an liu tan favor kontaktu:

Luis de Oliveira Sampaio
Diretor Executivo JSMP

Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl